

Ina bumba per l'onur da la Germania

Avant 60 onns ha la resistenza fatg in attentat sin Hitler

DA JOHANN ULRICH SCHLEGEL

■ Il 1. da fanadur 1944, apaina trais emnas avant l'attentat, era l'uffizier dal stab general Claus Schenk, cont da Stauffenberg anc vegnì promovi al colonel sin fundament da ses talent extraordinari. Duas lingias da sia vita mussan en direcziun d'ina carriera remartgabla: sia qualificaziun renconuschida lunsch enturn per ils pli auts posts da commando en l'armada ed a medem temp sia posiziun dominanta en la resistenza. Questa resistenza cunter Hitler era s'estendida ad in stadi autamain raffinà entaifer il stadi, che na fascheva betg mo plans, mabain preparava acziuns concretas cum nundumbrailleurs burgais simpels - che na conuschevan savens gnanc endretg lur rolla - fin a politichers, auts uffiziers e feldmarschals generals precisamain infurmads e bain preparads. En tresors vegnivan tegnids en salv programs guvernativs complets, las infurmaziuns necessarias per il radio, tut ils cumonds militars, ils scenaris per l'arrestaziun dal commando naziunalsocialist e ses remplazzament tras cumbattants da la resistenza - tut era elavurà fin en ils detagls. Ma cura ch'il chau da la resistenza, Graf Stauffenberg, ha dà il signal per l'attentat, è l'entir culp da stadi vegnì stenschentà en ina chadaina d'acziuns falladas cum millis victimas ed ina resistenza dal reschim naziunalsocialist probablaman sutstimada.

Ina chadaina d'acziuns falladas

Sper Stauffenberg s'engaschavan en l'ierarchia militara persunas da la resistenza fin si al feldmarschal general Günther von Kluge per in attentat. Ma i nun era simpel da tutgar Hitler. Conscient da sia periclitaziun, midava el adina puspè il chalender da termins, las rutinas da viadi e las modas da viver.

Oz n'esi betg pussaivel d'eruir definitivamain quantas emprovas d'attentat ch'en vegnidas fatgas en tut. Ils nundumbrailleurs exempels enconuschents cumprovan dentant cleramain che la conspiraziun era enorm activa. Ils cumbattants da la resistenza na sa limitavan berg als attentats, els empruvavan era d'impedir - uschenavant che quai steva en lur pussanza - en general ils cumonds despotics da Hitler u las ordras che cuntrafaschevan al dretg internaziunal. En vista a l'orientaziun ideologica e religiosa dal nov stadi dueva il cristianissem eser l'arma decisiva cunter l'impietad



Ils 20 da fanadur 1944 n'è l'attentat da Claus Schenk, cont da Stauffenberg, sin Adolf Hitler betg reussì. Anc il madem di è Schenck vegnì sentenzià a mort ed executà.

KEYSTONE

modernistica dal reschim e dal temp en general, e daventar il fundament regenerà, stabil e pertant dal stadi.

En l'emprima mesadad da l'onn 1944 speravan ils cumbattants da la resistenza anc da vegnir en discurs cum ils alliads suenter in putsch reussì e da cuntanscher ina pasch negoziada. Els savevan dentant ch'els stuevan prevegnir a l'invasiun da l'Engalterra sin la terra franca, spetgada gia daditg, sch'els na vulevan betg sa laschar reproschar d'avoir agì pir cura che la situaziun militara era già persa. Quest plan è lura vegnì destrùi ils 6 da zercladur cun l'invasiun en la Normandia. La resistenza ha stùi sa tschentat la dumonda decisiva: Fascheva l'attentat en questa situaziun insumma anc senn? Il conspiratur Tresckow ha respundi, sco quai che nus savain, a questa dumonda sco suonda: «L'attentat sto vegnir fatg, coûte que coûte.» Impurant na saja ussa «betg pli l'intent pratic, mabain il fatg che la resistenza tudestga

haja ristgà devant il mund e l'istoria d'exequir il culp decisiv». I gieva ussa per «salvar in rest d'onur per la Germania!» Per salvar questa onur eran ils umens da la resistenza pronts da ristgar lur vita.

En il fratemps era reussì als cumbattants da la resistenza anc in coup strategic impurtant en vista a lur plan da putsch. Els avevan favorisà e cuntanschì cun success la nominaziun da Stauffenberg sco chef dal stab dal cumandant da la reserva, colonel general Fritz Fromm. Questa posiziun ha possibilità a Stauffenberg da cumparair pli savens en il quartier general da Hitler per dar rapport. Per quest motiv e pervi da la chadaina incredibla d'emprovas d'attentat fin alura malreussidas è Stauffenberg la finala sa decidì d'exequir sez l'attentat.

L'andament da l'attentat

La damaun dals 20 da fanadur 1944 èn

sa tschentads Graf Stauffenberg, ses adjutant primilitinent von Haeften e maior general Stieff a Rastenburg (Prussia orientala) datiers dal quartier general da Hitler, la Wolfsschanze. Von Haeften purtava la mappa cun il material explosiv. Curt avant la discussiun davart la situaziun actuala ha insatgi en ina chombra daspera smatgà cun ina zanga platta l'envidader reglabel. L'ura è vegnida tschentada sin 15 minutias. Stauffenberg e ses adjutant Keitel èn entrads immediat tar Hitler ch'als ha salidà. Dentant referiva il litinent general Heusinger. Sper ina maisa, sin la quala era rasada ora ina charta, stevan in sper l'auter Stauffenberg, Heusinger e Hitler. Stauffenberg ha plassà la mappa cun la bumba diretamain sut la maisa, sper ils pes da Hitler. Alura ha Stauffenberg bandunà la stanza. Suenter paucas minutias è succedita ina terribla detonaziun. Stauffenberg e Haeften èn sa mess immediat sin via a la plazza aviatica. L'emprima bloc-

cada han els anc pudi passar, perquai che l'alarm ha reagì pir suenter ina minuta e mez. A la bloccada exteriura dentant èn els gia vegnids retegnids dal primsergent che fascheva guardia. Cun ina finta ha Stauffenberg pudi cugliunar la guardia e traversar la bloccada. L'aviu da Stauffenberg è partì immediat.

En il quartier general da Hitler eran in litinet general, in colonel ed in collavatur vegnids blessads grevemain, il colonel general Jodl, tschintg ulteriours generals, dus admirals ed in chapitani da la marina ed in litinent colonel eran blessads mo levemain. Hitler sez n'aveva - danor in pèr levas arsentadas e smatgadas - naganas blessuras. Sco previs ha el retschavi il medem suentermezdì Benito Mussolini ch'era arrivà cun in tren spezial.

Il culp da stadi na reussecha betg

Anc durant il sgol da return da Stauffenberg avevan ils cumbattants da la resistenza che spetgavan a Berlin survegnì - malgrà il scumond d'infurmaziun - la novitat ch'igl haja dà en il quartier general da Hitler in'explosiun e ch'in dumber pli grond d'uffiziers saja vegnì blessà grevemain. Questa novitat ha bastà al general Olbricht che aveva uss il commando. Il «Point of no return» era surpassà. Ils auturs dal delict na pudevan uss betg pli restar zuppad, tuttina sche Hitler era mort u betg. Il culp da stadi stueva cumenzar. Olbricht ha prendì or dal tresor ils documents preparads per il putsch ed ha dà ils cumonds.

En quest mument han dentant cumenzà ils sbags decisivs dal commando. Perquai ch'ils numerus telexs tramess han cumenzà a bloccar las atgnas lingias, han ils putschists en la Bendlerstrasse a Berlin fatg diever era da las lingias dal quartier general da Hitler per accelerar la transmissiun. Anc avant ch'il culp da stadi ha pudì vegnir instradà, è il reschim damai vegnì infurmà nunvulidamain davart il plan. Uschia ha pudì cumenzar la defensiu svelta ed efficacia cunter l'emprova da putsch. Ils uffiziers d'infurmaziun èn daventads malsegirs. Mo cun gronda precauzion devan els vienavant ils cumonds dals putschists. Anc pli precauts eran daventads ils cumandants. Uschia èsi stà simpel per il reschim da stenschentat da bell'entschatta la revolta en l'armada. Claus Schenk, cont da Stauffenberg, è vegnì arrestà a Berlin e sajettà anc la medema saira.